

1913–1918 жылдары Әлихан Бөкейхан, Ахмет Байтұрсынұлы, Міржақып Дулатұлы ыждағатымен Орынборда 265 саны шығып, большевизм теперішімен жабылды. 2006 жылы 22 наурызда Қоғабай Сәрсекеев Алматыда 266-санынан бастап қайта жаңғыртты

БҰРЫН ШІРКЕУ БОЛҒАН  
АЙЯ СОФИЯДА 92 ЖЫЛДА АЛҒАШ РЕТ  
ТАРАУЫҚ НАМАЗЫ ОҚЫЛДЫ



ҰЛТТЫҚ ВАЛЮТАСЫ, АНА ТІЛІ  
ЖОҚ ЛИХТЕНШТЕЙН ӘЛЕМНІҢ ЕҢ БАЙ ЕКІ  
ЕЛІНІҢ БІРІНЕ ҚАЛАЙ АЙНАЛДЫ?



## ҚАРЖЫ ПИРАМИДАСЫ

ҚАРАПАЙЫМ ХАЛЫҚТЫҢ  
ТАПҚАН-ТАЯНҒАНЫН ТОНАҒАНДАРҒА  
ҚАШАН ТОҚТАУ БОЛАДЫ?



Былтыр алаяқтардың арбауына түскен қазақстандықтар 54 млрд теңге қаржысынан айырылған...

Айдың-күннің аманында Нұр-Сұлтан қаласында Ішкі істер министрлігінің ғимараты жанында 32 жастағы Бағила Досмайылова өз-өзін өртеп жіберді. Денесінің көп бөлігін күйік шалған келіншектің қазір жағдайы ауыр, аурухананың жансақтау бөлімінде жатыр. Кейін оның қаржы пирамидасынан зардап шеккендігі анықталды. Атап айтқанда, ол Mudarabah Capital қаржы пирамидасы ісі бойынша жәбірленуші деп танылған және аталған компанияға 20 млн теңгесін құйған деседі. Бүгінде құзырлы органдар бұл мәселе бойынша тергеу амалдарын жүргізуде. Бұл – алаяқтарға алданып, тұзаққа түскендердің басы емес. Өкініштісі сол, аяғы да болмауы мүмкін. Ғайыптан тайып байлыққа кенелемін дегендер, артынан опық жегендер мыңдап саналады. Бірі дүние-мүлкінен, басыбайлы баспанасынан айырылса, енді бірі өз өмірлерін қиюға дейін барады. Қараша халықтың тапқан-таянғанын тонағандарға қашан тоқтау болады? Алаяқтарға алданудың сыры неде? Опық жегендерді заң қорғай ала ма? Тарқатайық...

### Жандар ТҰРАРҰЛЫ

#### ■ АЛАЯҚТАР АЙЫЛЫН ЖИЯР ЕМЕС

«Пәлен жерде алтын бар, іздеп барсаң мыс та жоқ». Бүгінде жылдам байлыққа кенеліп, әккі алаяқтардың арбауына түскен әлеуметтің саны жыл сайын артпаса, кемітін сыңай танытпайды. Ресми деректер мен дәйектер бұл пайымымызды жоққа да шығармайды. Мәселен, былтырдың өзінде қаржы пирамидасына қатысы бар 130 адам қылмыстық жауапқа тартылып, жазаға кесілген. Еліміз бойынша 31 мыңнан астам азамат қаржы пирамидасының құрбанына айналып, сан соғып қалған. Алаяқтардың арбауына түскендер 54 млрд теңгеден астам қаржысынан айырылған. Бұл көңіл көншітерлік сандар емес.

«Тегін ірімшіктің тек қақпанда ғана болатынын» ескермегендер бар дүние-мүлкін, тапқан-таянғанын неге күмәнді қаржылық құрылымдарға салады? Азаматтар олардың құрығына қалай ілігеді? Сарапшылардың сөзіне сенсек, халықтың қаржылық сауатының төмендігі осындай олқылықты жайттардың көптеп орын алуына жол беруде. Бұл – бір.

03-бетте

## ШҰБАРТАУ ШЫҢҒЫСТАУДЫҢ КҮНГЕЙІНДЕ...

РЕСПУБЛИКАЛЫҚ КОМИССИЯНЫҢ НАЗАРЫНА!



Қазақстандағы барлық аудандар сияқты 1928 жылы құрылған Шұбартау ауданы өз тарихында екі рет таратылды. Жылқы түлігін есіруге қолайлы аудан соңғы рет 1997 жылы оңтайландырудың өткір қайшысына ілікті...

Мемлекет басшысы Қасым-Жомарт Тоқаевтың «Жаңа Қазақстан: жаңару мен жаңғыру жолы» атты Жолдауын Қазақ елі қуана қарсы алды. Шын мәнінде, жұрттың көңілінен шыққан бұл Жолдауда айтылған ойлар мен жайлар елдің ертеңі толғандыратын әрбір азаматты бейжай қалдырмасы анық. Әсіресе, кезінде экономикалық негіздеусіз жасалған ықшамдаулар мен қысқартулардан болған зардаптарды жоюдың жолдары осы Жолдауда айқын көрсетілді. Алға қойылған бұл міндеттерді абыроймен жүзеге асыру, әрине аса ауқымды іс екендігі түсінікті. Алайда, кемел ойдан туындап, келешегімізді келбеттендіру мақсатын көздеген ұлы мақсатты іске қазақ халқы қазірден тас-түйін дайын деген ойдамыз.

### Ақаш КӨКСЕГЕН

#### ■ ОҢТАЙЛАНДЫРУДЫҢ ӨТКІР ҚАЙШЫСЫНА ІЛІНГЕН АУДАН ҚАЙТА ҚҰРЫЛСА...

Осы орайда ұлылардың бесігі, мәдениеттің алтын қақпа есігі болған бұрынғы Семей өңірін қайта түлетіп, оның аумағында Абай облысын құру туралы байлам өңірдің адамдарын ғана емес, барша Қазақ елін ерекше қуантқан тарихи маңызы бар жаңалық болды. Президенттің бұл шешімі көрмегенді көріп, тоталитарлық жүйенің небір сұмдығын басынан өткерген өңір тұрғындары үшін үлкен рухани қолдау болды.

06-бетте

## ҚАНАУ МЕН ТОНАУ

«СЫРТҚА АҚША ЖАСЫРҒАН БАСШЫНЫҢ ЕЛДІ ТҮБІ  
ҚҰРДЫМҒА АПАРАТЫНЫН» ҰМЫТУҒА БОЛМАЙДЫ

Қаңтар оқиғасы саяси-экономикалық және әлеуметтік тұрғыдан қоғамның қорғанышсыз әлсіз қалғанын көрсетіп берді. Мемлекеттің негізін шайқалтатын, еліміздің тәуелсіздігіне қауіп төндіретін мұндай жағдайды болдырмау үшін не істеу керектігі баршамызды толғандыруы тиіс. XX ғасырдың соңғы он жылдығында еліміздің өз тәуелсіздігіне қол жеткізуі – халқымыздың тарихи дамуының беталысын айқындайтын маңызды оқиғаға толы болды. Еліміз өз азаттығын жариялай отырып, адамзаттың өркениеттік дамуының бірден-бір сара жолы іспетті демократиялық саяси жүйеге бағыт ұстанды. Мұның өзі бұған дейін әлеуметке қызмет етіп келген саяси, экономикалық, рухани салалардағы түбірлі өзгерістерді қажет ететіндігі белгілі еді. Бірақ, оның жүргізілуінде тұрлаулылық болмады.

### Ермек ЖҰМАХМЕТҰЛЫ

#### ■ БІЗГЕ КЕЗ КЕЛГЕН ҚИЫНДЫҚТАН ШЫҒЫП КЕТУГЕ БЕЙІМ ШЕНЕУНІКТЕР КЕРЕК

Қазақстан – орасан зор аймақ. Оның күнделікті ұсақ-түйек жұмыстарына араласып отыруға Президенттің уақыты да жетпейді. Демек, бір ұсынысымыз бар. Қазіргі жағдайда еліміздің төрт аймағында Президенттік басқару жүйесіне бағынатын Президент өкілі институтын енгізу керек сияқты. Егер сол институт көрсетілген сенімді ақтамаса, таратып жіберу қиын емес. Бұл Президент аппаратын басы артық жұмыстардан босатып, бақылау орнатуға мүмкіндік береді. Бұл кез келген істе халықтың да қызығушылығын арттырады. Кадрларды іріктеуге де, тәрбиелеуге де көмектеседі.

04-бетте













